



ILIDŽA

INFORMATIVNI BILTEN OPĆINE ILIDŽA
Ilidža • Januar 2016 • Broj 145





REDOVNA SJEDNICA OPĆINSKOG VIJEĆA

Utvrđen Nacrt odluke o usvajanju i provođenju RP „Kovači”

Općinsko vijeće Ilidža na 35. redovnoj sjednici održanoj 28. januara 2015. godine u Multifunkcionalnoj sali utvrdilo je Nacrt Odluke o usvajanju Regulacionog plana „Kovači” i Nacrt Odluke o provođenju Regulacionog plana „Kovači” i uputilo ga na javnu raspravu u trajanju od 30 dana. Zadužuje se Služba za prostorno uređenje da u saradnji sa Zavodom za planiranje razvoja Kantona Sarajevo organizuje i provede javnu raspravu o Nacrtu Odluke o usvajanju Regulacionog plana „Kovači” i Nacrtu Odluke o provođenju Regulacionog plana „Kovači”. Javna rasprava o Nacrtu Odluke o usvajanju Regulacionog plana „Kovači” i Nacrtu Odluke o provođenju Regulacionog plana „Kovači” održat će se 03. marta 2016. god. u 17:00 sati u Mjesnoj zajednici Hrasnica II ulica Stari drum br. 48a. 4. Zadužuje se Služba za prostorno uređenje da u saradnji sa

Zavodom za planiranje razvoja Kantona Sarajevo podnese izvještaj o rezultatima javne rasprave i pripremi Prijedlog Odluke o usvajanju i provođenju Regulacionog plana „Kovači”.

Mahir Lokvančić i Fadil Lokvančić nisu više članovi SDP-a

Dosadašnji vijećnici SDP-a Mahir Lokvančić i Fadil Lokvančić više nisu članovi SDP-a Ilidža te će ubuduće djelovati van kluba vijećnika. U narednom periodu sva prava i obaveze koje proizilaze iz pozicije predsjednika Kluba vijećnika SDP-a prelaze na dosadašnjeg zamjenika predsjednika kluba Samira Avdića.



Prijedlozi akata o regulisanju imovinsko-pravnih odnosa

Vijeće je usvojilo prijedlog akata o regulisanju imovinsko-pravnih odnosa i to prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima Štitkovac Merke i Ibrahima, Muharemović Vahida, Lukač Smaila, Škrijelj Adema, Alihodžić Nijaza i Hadžić Mensura i Muhameda. Usvojen je i prijedlog rješenja o rješavanju imovinsko-pravnih odnosa u svrhu legalizacije pomoćnog objekta po zahtjevu Baralija Jusufa, te prijedlog izmjene rješenja po zahtjevu Šehović Dervise.

Donesena Odluka o pristupanju RP „Gornje Telalo polje”

Općinsko vijeće Ilidža na 35. redovnoj sjednici donijelo je Odluku o pristupanju Regulacionog plana „Gornje Telalo polje.” Površina obuhvata iznosi 89,3 ha. Okvirna sredstva za pripremu i izradu Plana u iznosu od 83.000,00 KM obezbijedit će Općina Novi Grad Sarajevo u Budžetu za 2016. i 2017. godinu, i to: u 2016. godini iznos od 51.000,00 KM, a u 2017. godini iznos od 32.000,00 KM. Stvarni troškovi će se utvrditi nakon provođenja tenderskih postupaka i na bazi projektnih zadataka.



Javni poziv za predlaganje kandidata za priznanje Općine

Na osnovu Odluke o priznanjima Općine Ilidža, Općinsko vijeće donijelo je Odluku o raspisivanju Javnog poziva za predlaganje kandidata za dodjelu priznanja Općine Ilidža i to: Zlatna i Srebrna plaketa i Zahvalnica Općine Ilidža. Priznanja Općine Ilidža dodjeljuju se pojedincima i kolektivima sa područja općine Ilidža za izuzetne uspjehe u razvoju privrednih i društvenih djelatnosti, kao i značajan doprinos u odbrani općine. Izuzetno, priznanja se mogu dodijeliti pojedincima i kolektivima koji nisu sa područja općine Ilidža, ako su njihovi rezultati primjereni ugledu općine. Priznanja se mogu dodjeljivati i posthumno. Prijedloge za dodjelu priznanja mogu podnositi građani pojedinci, udruženja građana, savjeti mjesnih zajednica, boračke organizacije i udruženja, političke partije, vijećnici Općinskog vijeća Ilidža, općinski načelnik, ustanove i drugi organi i organizacije sa područja općine Ilidža. Priznanja se ne mogu dodijeliti uposlenicima općine Ilidža za rezultate ostvarene u obavljanju poslova predviđenih opisom radnog mjesta, vijećnicima Općinskog vijeća Ilidža i članovima Savjeta mjesnih zajednica u vrijeme trajanja mandata. Priznanja se ne mogu dodijeliti kolektivima ili pojedincima kojim su ista dodijeljena u posljednjih pet godina. Prijedlozi za dodjelu priznanja podnose se u pisanoj formi sa obrazloženjem i relevantnom dokumentacijom sa naznakom za koju vrstu priznanja se podnosi prijedlog. Svaki prijedlog za dodjelu priznanja mora biti obrazložen i dokumentovan.

Saglasnost na Plan i Program održavanja, zaštite, rekonstrukcije i izgradnje lokalnih i nerazvrstanih cesta

Vijeće je donijelo zaključak o davanju saglasnosti na Plan i Program održavanja, zaštite, rekonstrukcije i izgradnje lokalnih i nerazvrstanih cesta na području općine Ilidža za 2016. godinu. Zakonom o cestama Federacije BiH uređen je pravni položaj javnih cesta, upravljanje, građenje, održavanje i ustupanje radova, zaštita cesta i uslovi odvijanja prometa na cestama, finansiranje kao i druga bitna pitanja značajna za općinu na nivou lokalnih i nerazvrstanih cesta. Odredbama Odluke o razvrstavanju vangradskih cesta na području Kantona Sarajevo utvrđene su lokalne ceste na području općine Ilidža. Sve ceste koje nisu razvrstane u jednu od kategorija javnih cesta su nerazvrstane ceste i u nadležnosti su Općine. Ovim planom i programom utvrđen je obim, vrsta, vrijednost i dinamika izvođenja radova na održavanju, zaštiti, rekonstrukciji i izgradnji lokalnih i nerazvrstanih cesta u skladu s planiranim budžetskim sredstvima, a bazirano je na realnim potrebama normalnog funkcionisanja saobraćaja i na konsultacijama i prijedlozima organa mjesnih zajednica.

Donesena Odluka o izmjenama i dopunama Odluke o prekršajima protiv javnog reda i mira

Općinsko vijeće je donijelo Odluku o izmjenama i dopunama Odluke o prekršajima protiv javnog reda i mira na području općine Ilidža kojom se mijenja član 8 kojim nije precizirano koji su to nadležni inspeksijski organi. Inicijativu za pokretanje izmjene i dopune člana 8 Odluke podnijela je Kantonalna uprava za inspeksijske poslove Kantona Sarajevo i da predložena izmjena i dopuna dovodi do jasnoće u određivanju nadležnog inspeksijskog organa kod vršenja nadzora u ovoj oblasti.





Hadžibajrić u posjeti Općini Ilidža

Načelnik Općine Stari grad Sarajevo Ibrahim Hadžibajrić posjetio je 20. januara 2015. godinu Općinu Ilidža. Sa načelnikom Općine Ilidža prof. dr. Senaidom Memić razgovarao je o aktuelnim projektima za razvoj općina i problemima sa kojima se suočavaju u svom radu.

Razmijenili su iskustva, te razgovarali o intenzivnijim vidovima saradnje. Aktivnosti općinskih uprava u 2016. godini trebale bi biti usmjerene na poboljšanje i razvoj infrastrukture, novu gradnju, jačanje komunikacije sa građanima, te razvoj turizma, zaključili su načelnici ove dvije općine. Dogovorena je da ove dvije kantonalne općine nastave i u budućnosti dobru saradnju iz nadležnosti lokalne uprave.



Uručene stipendije za 127 učenika i studenata slabijeg imovnog stanja i 39 djeci bez oba roditelja

Općinsko vijeća Ilidža donijelo je Odluku o stipendiranju djece bez oba roditelja i djece bez roditeljskog staranja u školskoj 2015/2016. godini. Ovom odlukom stipendirat će se 39, i to 19 studenata, 10 učenika srednje škole i 10 osnovaca. Vijeće je donijelo i odluku o stipendiranju 127 učenika i studenata slabijeg imovnog stanja. Odlukom će se stipendirati 50 studenata i 77 učenika.

Načelnik Općine Ilidža prof.dr. Senaid Memić 12. januara u Multifunkcionalnoj sali uručio ugovore o stipendiranju 127 učenika i studenata slabijeg imovnog stanja i 39 bez roditeljskog staranja.

“Odlukom o stipendiranju djece bez oba roditelja odobrena su sredstva iz Budžeta i to učenicima po 75 KM mjesečno, a 100 KM redovnim studentima. Isplata će se vršiti od 1.10 2015. godine do 30.09. 2016. godine. Stipendije se dodjeljuju djeci bez oba roditelja, kao i djeci bez roditeljskog staranja koja imaju prebivališta i boravak na području općine Ilidža, koja redovno pohađaju školu, a najduže do navršene 27 godine života. Kad je riječ o stipendiji za učenike i studente slabijeg imovnog stanja, mjesečni iznos stipendije je 75 KM, a za studente 100 KM. Stipendije će se dodjeljivati 10 mjeseci. Sredstva dodjeljena stipendijom se ne vraćaju. Drago mi je što su se obezbijedila sredstva za učenike i studente i čestitam svima koji su dobili i nadam se da će im poslužiti za nešto što im je najpotrebije, a ujedno i da će malo olakšati svojim roditeljima” rekao je, između ostalog, načelnik Memić.

Načelnik poželio dobrodošlicu novim volonterima

Načelnik Općine Ilidža prof. dr. Senaid Memić upriličio je 20. januara prijem za nove volontere koji će svoja prva radna iskustva sticati u Općini Ilidža.

Uz riječi dobrodošlice načelnik je upoznao nove volontere sa njihovim pravima i obavezama tokom perioda volontiranja u Općini Ilidža.

Radi se o diplomiranim i bachelor studentima sa Fakulteta za javnu upravu, Ekonomskog, Elektrotehničkog Pravnog, Fakulteta političkih nauka, Arhitekture, Saobraćajnog te Poljoprivrednog fakulteta.

“U Općini Ilidža su nastojanja da se usmjere mladi da što više nauče. Na kraju svog jednogodišnjeg staža, dobit ćete potvrdu o završetku volontiranja čime ste stekli uvjete za apliciranje za posao. Želim Vam sreću i ugodno jednogodišnje iskustvo” rekao je načelnik Memić.





Ilidžu u 2015. godini posjetilo 138 667 turista

Prema podacima Turističke zajednice Kantona Sarajevo općinu Ilidža u 2015. godini posjetilo je 138 667 turista, a ostvareno je 253 455 noćenja što je za 37,35 procenata više u odnosu na 2014. godinu. Već duži niz godina Ilidža je najposjećenija općina u Kantonu Sarajevo, koja raspolaže sa 14 hotela, dva motela, jednim prenoćištem i auto kampom čiji su kapaciteti 2154 kreveta. Pored smještajnih kapaciteta Ilidža raspolaže i sa Vrelom Bosne koje je u 2015. godini obišlo 188 000 posjetilaca i Spomenički kompleks „Tunel spasa“ koji je ostvario 115 000 posjeta.



Za stipendije Općina dala 426.420 KM

Općina Ilidža je za školsku 2015/2016. godinu na ime stipendija izdvojila 426.420 KM i stipendira 475 učenika i studenata

Stipendije se daju u tri kategorije: talentovani, učenici i studenti slabijeg imovnog stanja i djeci bez roditeljskog staranja. U školskoj 2015/2016. stipendirat će se 309 talentovanih učenika i studenata, 127 učenika slabijeg imovnog stanja i 39 bez roditeljskog staranja.

Iz Budžeta je za stipendiranje talentovanih učenika izdvojeno 278.620 KM, za kategoriju slabijeg imovnog stanja 107.750 KM i za djecu bez roditeljskog stanja 40.800 KM.

Komisija za dodjelu novčanih pomoći socijalno ugroženim licima Općine u 2015. godini razmatrala je 1187 zahtjeva od toga 1008 pozitivno i za te namjene u 2015. godini dato je 143.600 KM.

Općina Ilidža je i na ime participacije u liječenju teško oboljelih lica u 2015. godini refundirala 80.300 KM.

Nastavak projekta izgradnje vodovoda u Rakovici

Projekat vodosnabdjevanje Rakovice i u 2016. bit će jedan od većih projekata koje treba realizirati.

Izgradnjom novog vodovoda bit će obuhvaćene kuće na području od 12 kvadratnih kilometara, a u ovoj godini je planiran završetak izgradnje prve faze projekta. Završetkom prve faze bit će obuhvaćeno 75 posto stanovništva ovog područja.

Do sada je izgrađeno pet rezervoara ukupne zapremine 5.300.000 litara vode te pet prepumpnih stanica s pumpanjem vode do 700 metara nadmorske visine. Dovršen je glavni distributivni cjevovod i skoro sva sekundarna vodovodna mreža.

U 2016. godini planirano je 350.000 KM za završetak izgradnje prve faze projekta. Realizacijom prve faze izgradnje sistema ukupno je planirano priključiti 1.750 objekata. Do sada je priključeno 1.520 objekata.





Služba civilne zaštite za građane 24 sata u slučaju poplava

Služba civilne zaštite Općine Ilidža je u pripravnosti i tu su za građane u slučaju poplava, i drugih prirodnih nesreća koje mogu predstavljati opasnost po ljude i okoliš.

“Možemo reći da je iz sredstava za zaštitu i spašavanje od prirodnih i drugih nesreća, svake godine izdvajan zakonski maximum za finansiranje preventivnih mjera i zajedno sa našom službom utrošeno za projekte uređenja riječnih korita i sanaciju klizišta. Što se tiče finansijskih sredstava, u skladu sa Odlukom Federalne vlade o raspodjeli sredstava, osim preventivnih mjera sredstva se koriste za opremanje struktura civilne zaštite i obuku. Općina Ilidža ima formiran Općinski štab CZ kao najveće stručno-operativno tijelo koje upravlja u vanrednim situacijama, šest službi zaštite i spašavanja formiranih u građevinskim firmama i udruženjima građana i povjerenike u svim mjesnim zajednicama” rekla nam je Mira Boras, pomoćnik načelnika za poslove civilne zaštite.

Ona je istakla da su sve strukture solidno opremljene za djelovanje u prirodnim i drugim nesrećama, a njihovo opremanje će se nastaviti.

“Finansijska sredstva za ove namjene nisu dovoljna, naročito za projekte prevencije, ali obaveza je i viših nivoa vlasti da se uključe u skladu sa svojim mogućnostima i pomognu lokalnim zajednicama. Svi pripadnici CZ su prošli određeni vid obuke, a težiti ćemo i raznim specijalističkim obukama” dodala je Boras.

Na području općine Ilidža plavna područja su u MZ Rakovica- duž Rakovičkog potoka i u blizini auto-puta, MZ Stup - naselje Doglodi, MZ Otes- u dijelu sastavaka tri rijeke, MZ Osjek - duž rijeke Bosne i Zujevine, kao i područja podzemnih voda, MZ Blažuj- dio Vlakova u blizini auto-puta i duž Rakovičkog potoka i dalje predstavljaju rizično područje.

“Treba podsjetiti i na zakonsku odredbu samih građana, koji su dužni preduzeti preventivne mjere na svojoj imovini. Prvenstveno se misli na odlaganje otpada i smeća na za to određena mjesta, pročišćavanje kanala i propusta za otpadne i površinske vode, u slučaju prirodnih nesreća skloniti stvari na više spratove, nabaviti određenu količinu hrane, higijene i pitke vode i slično, a ovo odnosi i na pravna lica” kaže Boras.

U toku uređenje kanala za odvodnju površinskih voda u Blažuju

Općina Ilidža putem izvođača radova MGBH d.o.o. Sarajevo vrši uređenje kanala za odvodnju površinskih voda u naselju Blažuj, dionica od brze ceste do rijeke Zujevine. Dužina kanala je 190 m a širina oko 3m. Funkcija mu je prihvat i odvod površinskih voda iz naselja Kamenolom. Vrijednost radova je oko 7.000,00 KM.



Podneseno 1800 zahtjeva za legalizaciju

Na osnovu Odluke o izmjenama i dopunama Odluke o legalizaciji građevina izgrađenih bez odobrenja za građenje i građevina privremenog karaktera data je mogućnost da se zahtjevi za donošenje rješenja o naknadnoj urbanističkoj saglasnosti mogu podnijeti do 31.01. 2016. godine.

U Općini Ilidža je do 31. januara poneseno 1800 zahtjeva za naknadnu urbanističku saglasnost. Zbog velikog broja zahtjeva i potrebe rješavanja određenih pitanja (kompletiranje zahtjeva, rješavanja imovinsko-pravnih odnosa i drugih pitanja) teško je precizirati u kom vremenskom periodu će se predmeti rješavati.

Opredjeljenje Općine Ilidža jeste da zahtjevi se rješavaju pozitivno u skladu sa Zakonom, uz rješavanje prethodnih pitanja.





Tradicionalni prijem za direktore osnovnih škola

Načelnik Općine Ilidža prof.dr.Senaid Memić 7. januara 2016. godine upriličio je tradicionalni prijem za direktore osnovnih i srednjih škola sa područja ove općine. Razgovarano je o aktivnostima škola, dosadašnjoj saradnji, te načinima pomoći školama.

Direktori škola izrazili su zadovoljstvo dosadašnjom saradnjom sa Općinom Ilidža koja im je i do sada izlazila u susret i podržavala njihove aktivnosti, a pozitivno su ocijenili i sastanak koji je bio prilika da se naprave planovi za naredni period. Načelnik Općine Ilidža obećao je i u ovoj godini finansijsku pomoć ovim školama.

“Drago mi je da su direktori zadovoljni saradnjom sa Općinom. Jednako smo odgovorni, vi radite najčasniji posao, a to je učenje djece. Provodimo niz zajedničkih projekata, odgovaramo na vaše zahtjeve u skladu sa našim mogućnostima iako nemamo nadležnost, ali djeca su naša najveća obaveza i tu nadležnosti nisu bitne” izjavio je načelnik Memić.

Riješen problem javne rasvjete kod Stupske petlje

Općina Ilidža riješila je problem javne rasvjete u ulici Džemala Bjeđića, tačnije od Stupske petlje prema Ilidži. Nadležna općinska služba je u saradnji sa Ministarstvom komunalne privrede i infrastrukture Kantona Sarajevo izvršila premještanje oštećenog razvodnog ormara javne rasvjete na drugu adekvatnu lokaciju. Putem Elektroprivrede izvršeno je premještanje mjernog mjesta na novu lokaciju te je puštena javna rasvjeta u funkciju.

Pozitivne strane Izmjena i dopunama Zakona o zakupu poslovnih zgrada i prostorija

Izmjenama i dopunama Zakona o zakupu poslovnih zgrada i prostorija, koje su usvojene na sjednici Skupštine Kantona Sarajevo, održanoj 7. oktobra 2015. godine, omogućeno je općinama kao zajmodavcima poslovnih prostora da na brži način rješavaju probleme koje imaju sa zakupcima svojih poslovnih prostora koji ne plaćaju naknade zakupa. Općina sve ugovore zaključuje na određeno vrijeme. Ukoliko se ne plate dvije ili tri mjesecne kirije dostavljala se zakupodavcu opomena. Ako i tada se ogлуši, u datom roku dostavljala se izjava u kojoj se traži odustajanje od ugovora i traži u roku od 30 dana da se preda prostor zakupodavcu. Ukoliko se ne isprazne prostorije u zadatom roku pokretao se postupak na sudu. Zbog sudskih sporova oko naplate zakupnine koji najčešće traju dugi niz godina, općine nisu mogle doći u posjed tih prostora do okončanja sudskog postupka. Novim izmjenama nadležna općinska služba će rješenjem naložiti zakupcu iseljenje iz općinskog poslovnog prostora u roku od osam dana. Značajna je novina da žalba na rješenje ne odlaže njegovo izvršenje, te ako zakupac ne preda ispražnjene poslovne prostorije u tom roku, zakupodavac će sam provesti postupak iseljenja zakupca. Izmjenama pomenutog zakona, koje su usvojene po skraćenom postupku, propisano je da ukoliko zakupac ne plaća zakupninu za poslovni prostor i vodi se sudski postupak za naplatu duga od četiri i više neplaćenih zakupnina, zakupodavac ima pravo otkazati ugovor o zakupu, odnosno i prije sudske presude izvršiti iseljenje iz općinskog poslovnog prostora uz asistenciju nadležnih organa Ministarstva unutrašnjih poslova Kantona Sarajevo. Općina Ilidža ima 50 poslovnih prostora.

U ovoj godini prvi čovjek je obećao finansijska sredstva u iznosu 30.000 KM Trećoj osnovnoj školi za sanaciju kabine-ta matematike, sanaciju mokrih čvorova u fiskulturnoj sali i opravku krova na ovoj sali.



Uređenje Male aleje u ovoj godini

Općina Ilidža u ovoj 2016. godini planira rekonstrukciju Male aleje. Vrlo bitno opredjeljenje Općine Ilidža u postupku izrade idejnog projekta uređenja Male aleje je bilo kulturno-historijsko i prirodno obilježje kao ideja vodilja. Posebna pažnja kod planiranja uređenja bila je posvećena organizaciji prostora i zadovoljenju funkcionalnih zahtjeva u samom prostoru, očuvanju postojećeg zelenila i projektovanje novog u skladu sa klimatskim uvjetima i namjenskom prostoru, kao i racionalnost i ekonomičnost u cjelini.

Projekat uređenja je prevashodno baziran na rješavanju partera u okviru kojeg je definisana obrada podloga, prolaz vozila u hitnim slučajevima, urbani mobilijar za sjedenje, javna rasvjeta, hortikulturno uređenje, instalacije, odvodnja kao i ostali elementi uređenja prostora. S obzirom na vrijednost investicije uređenja centra Ilidže je podijeljeno u tri faze i to: prva faza uređenje prostora Male aleje, druga prostor saobraćajnice Rustempašine od kružnog toka do Rustempašinskog mosta i treća uređenje ulice Emira Bogunića Čarlija.

U toku ove godine izvodit će se radovi u ulici Mala aleja, a po okončanju istih shodno raspoloživim sredstvima i sticanju uslova (rješavanje imovinsko-pravni odnosa i rješavanje kolskog saobraćaja) realizacija će se i druga i treća faza.

Budžetom Općine Ilidža za uređenje ovog prostora u 2016-toj godini je planirano 250.000 KM.





Podijeljeno 65 plastenika

Općina Ilidža kontinuirano podržava razvoj primarne poljoprivredne proizvodnje. U 2015. godini Općina Ilidža je podijelila 65 plastenika površine 100 kvadratnih metara sa kompletnom opremom čija pojedinačna vrijednost iznosi oko 3000 KM. Za te namjene izdvojeno je iz Budžeta 192.994,69 KM. Realizovana je i podjela sadnica maline na području naše općine. Podijeljeno je 29.000 sadnica maline za 22 korisnika, a ukupno je izdvojeno 32.190,00 KM.

Marko Čolo jedan od dobitnika plastenika izrazio je zahvalnost Općini Ilidža na dobijenom plasteniku.

„Mnogo hvala Općini i načelniku prof. dr. Senaidu Memiću. Ja sam radio ali se isplatilo. Sadio sam paradajz, paprike, krastavice i špinat. Malo sam prodavao, ali više djelio rodbini i prijateljima. I u ovoj 2016. godini se nadam da ću kao i u 2015. imati dobar urod” rekao nam je Čolo.

Načelnik Općine Ilidža prof. dr. Senaid Memić rekao je da dodjela plastenika, pomoć i obaveza prema ljudima koji žele da rade i zarade za život.

„Naše opredjeljenje je da je ovo najbolji način da pomazemo građanima, da im omogućimo da sami svojim radom proizvedu hranu za svoje potrebe i da ostvare dodatni prihod, te smatramo da je ovo ulaganje u poljoprivredu korisnije nego neki drugi vid pomoći. Do sada je Općina od 2010. do sada podijelila ukupno 370 plastenika čija ukupna vrijednost iznosi oko milion KM” kazao je načelnik Općine Ilidža prof. dr. Senaid Memić.

Općina finansira užine za učenike slabijeg imovnog stanja

Općina Ilidža je putem Službe za obrazovanje, kulturu, sport i informisanje u saradnji sa 10 osnovnih škola sa područja općine Ilidža finansirala kupovinu užina za učenike u stanju socijalne potrebe. Novčana sredstva u iznosu 19.979,98 KM doznačena su svim osnovnim školama za kupovinu užina učenicima u stanju socijalne potrebe za drugo polugodište 2015/2016.

Sklopljeno 539 brakova

Broj sklopljenih brakova u Općini Ilidža u 2015. godini povećan je u odnosu na 2014. godinu. Svoje sudbonosno „Da“ pred matičarem Općine Ilidža izreklo je i u novi zajednički život krenulo, 539 parova.

Sklopanje braka u Općini Ilidža je jednostavno, ukoliko se dostavi sva potrebna dokumentacija.

Matičar u dogovoru sa budućim bračnim partnerima određuje datum sklopanja braka, a rok može biti kraći od 30 dana od dana prijavljivanja namjere sklopanja tog braka. Svi potrebni obrasci za obavljanje vjenčanja u Općini Ilidža su besplatni i dostupni kako na web stranici tako i na Info-pultu Općine.



Vjenčanja su besplatna srijedom i subotom u službenim prostorijama općine. Sam čin sklopanja braka se također može obaviti i van službenih prostorija Općine. Kada se sklopanje braka odobri izvan službene općinske prostorije, na mjestima kao što su hoteli, restorani, budući bračni partneri su dužni platiti novčanu naknadu, u iznosu od 400,00 KM. Sklopanje braka u ovakvim slučajevima vrši se svakog dana u vremenu od 10,00-19,00 sati. Vlasnici ugostiteljskih objekata dužni su obezbjediti prikladnu prostoriju sa odgovarajućim uslovima za obavljanje svečanog čina sklopanje braka. Budući bračni partneri koji žele da brak sklope u dane koji posebnim aktom Općinskog načelnika nisu utvrđeni kao dani u kojima se vrši sklopanje brakova u službenoj općinskoj prostoriji, tj. srijedom i subotom, mogu to zahtjevati isključivo u radne dane u vremenu od 10.00 do 18.00 sati uz plaćanje naknade u iznosu od 100 KM.





Zimski raspust u Školi prijateljstva

Zimski raspust u Školi prijateljstva bio je ispunjen edukativno-zabavnim sadržajem. Polaznici/ce Škole prijateljstva su uživali u raznim izletima koje su za njih organizovali. Na početku raspusta, polaznici/ce su posjetili TV Alfu. Tom prilikom djeca su vidjela kako nastaje TV program, kako teče snimanje emisija, a upoznali su i novinare/ke ove televizije. Polaznici/ce Škole prijateljstva okušali su se i kao voditelji Dnevnika. Mnogi od njih su izrazili želju za ovim zanimanjem u budućnosti.

Njihov sljedeći izlet uključivao je odlazak na klizanje na Termalnu rivijeru Ilidža, a 24-ero djece je uživalo u trosatnom klizanju. Iako je bilo padova, mali heroji su se odlično snalazili i uspješno savladali ovu sportsku vještinu.

Sredina mjeseca bila je rezervisana za posjetu Zemaljskom muzeju BiH. Većini polaznika/ca Škole prijateljstva, ovo je bila prva posjeta ovoj ustanovi kulture. Polaznici nisu krili oduševljenje ovom posjetom i sa radozljivošću su posmatrali eksponate u muzeju.

Još jedna edukativno-zabavna posjeta je bila posjeta Međunarodnom aerodromu Sarajevo, 22. januara 2016.g. Polaznici/ce Škole prijateljstva su i ovaj dan iskoristili kvalitetno. Naime, posjetom Međunarodnom aerodromu Sarajevo su se upoznali sa načinom funkcionisanja vazdušnog saobraćaja, opremom, te zanimanjima vezanim za isti.

Uskoro pokrivenost općine videonadzorom

Strategijom razvoja Općine Ilidža za period 2014-2020. planirano je da Ilidža bude pokrivena video nadzorom radi sigurnosti građana.

Pored videonadzora koji se nalaze na autobuskom terminalu i podhodniku na Stupu, Općina Ilidža je izradila projekat, po kojem je u toku procedura javna nabavka za kupovinu 24 sigurnosne kamere, koje će biti postavljene na objektima mjesnih zajednica, frekventnim ilidžanskim raskrscima, samom centru općine kao i međuentitet-skim linijama razgraničenja.

Za nabavku videonadzora planirano je 230.000 KM. Kamere će biti spojene optikom na centralni operativni nadzorni centar koji će se nalaziti u prostorijama Četvrte policijske uprave.

Nakon okončanja javne nabavke, jer je u toku razmatranje kod Ureda za žalbe BiH, nakon žalbe jednog ponuđača, načelnik Općine Ilidža prof. dr. Senaid Memić

Biblioteka Doma kulture Hrasnica bogatija za 506 bibliotečkih jedinica

Već nekoliko godina, između Biblioteke Doma kulture Hrasnica i NUBBIH („Nacionalna i univerzitetska biblioteka Bosne i Hercegovine“) postoji veoma dobra saradnja, a kao rezultat toga i u znak podrške radu, NUBBIH je ovoj biblioteci više puta upućivala vrijedne poklone kojim je dopunjavan i poboljšan bibliotečki fond.

Ovog puta biblioteka Doma kulture Hrasnica bogatija je za 506 bibliotečkih jedinica, odnosno 346 novih naslova /veći dio izdanja iz 2015.god./, od kojih je, pored opće književnosti i književnih djela namijenjenih najmlađim čitaocima, određeni broj iz različitih naučnih disciplina i stručnih oblasti (prirodne nauke, društvene nauke, primjenjene nauke, psihologija, religija, sport, historija,...).

Ovo nije prvi put da NUBBIH na ovakav način pruža podršku radu biblioteke Doma kulture Hrasnica.



se nada što bržem rješavanju kako bi se pristupilo realizaciji ovog projekta.

Prema njegovim riječima Općina Ilidža će i u budućnosti vršiti nabavku video nadzora s ciljem pokrivenosti što većeg teritorija kako bi se bar donekle „primakli“ procentualno standardu razvijenih zemalja.





“Dani teatarske umjetnosti”

Festival “Dani teatarske umjetnosti” u organizaciji Kulturno umjetničkog društva “Ekrem Mujkić” održao se u Domu kulture Butmir. Sa predstavom “To je to” pod rukovodstvom Habiba Selmanovića Belog predstavio se KUD “Ekrem Mujkić.”

Amatersko pozorište “Neretva” iz Konjica, sa predstavom “Braća Grim” predstavilo se butmirskoj publici. Predstava je bila namijenjena za najmlađe. Gosti su bili članovi Dramske sekcije iz Živinica sa predstavom “Biće, biće”.

“Posebnu draž festivalu pružila je publika koja se ove godine odazvala u najvećem broju. Zahvaljujući njima, festival je protekao onako kako smo zamišljali” rekao nam je Habib Selmanović Beli iz KUD-a Ekrem Mujkić.



Proplivalo 518 osnovaca

Općina Ilidža u saradnji sa JP Olimpijski bazen “Otoka” d.o.o Sarajevo realizovala je projekat Škole plivanja za učenike četvrtih razreda sa područja ove općine. U projektu je učestvovalo 518 osnovaca iz deset osnovnih škola kao i učenici iz škole El-manar. Procenat odziva učenika je 78,25. Školi je prisustvovalo 260 dječaka i 258 djevojčica. Općina je za ovaj projekat obezbijedila 20 hiljada KM. Obuku u trajanju 10 dana relizovali su profesori sporta i tjelesnog odgoja iz Olimpijskog bazena i studenti Fakulteta za sport i tjelesni odgoj. Radili su sa grupama do sedam polaznika.

U toku realizacije pomenutnog projekta kordinator iz općine je redovno obilazio učenike. Na kraju ciklusa je izvršeno finalno testiranje. Iz Općine Ilidža se nadaju da će se projekat nastaviti i ubuduće.

BK Ilidža na pripremama za kvalifikacije za olimpijske igre

Bokseri BK “Ilidža” Džemal Bošnjak (-81 kg) i Adem Fetahović (-69 kg) u pratnji trenera Almedina Fetahovića obavili su desetodnevne pripreme na Bjelašnici pred kvalifikacione turnire za olimpijske igre u Rio de Janeiru - Brazil, koji ih očekuju u aprilu i maju 2016. u Azerbejdžanu i Turskoj.

“San svakog sportiste je nastup na oplimpijskim igrama, pa ukoliko bi neko od ove dvojice takmičara izborio normu za nastup to bi bio historijski uspjeh za bh. boks”, izjavio je Almedin Fetahović.





UABNOR obilježio 74 godine Igmanskog marša

Ove godine UABNOR-a Ilidža 30. januara 2016. godine obilježio je jubilej 74 godine legendarnog „Igmanskog marša“. Tim povodom položeno je cvijeće na spomen obilježja Vrelo Bosne i u Osjeku, a na Gubavcu okupilo se preko 1000 antifašista i poštovalaca tekovina NOB-a. Prisutnim su se obratili predsjednik Udruženja Nikola Babić i u ime Općine Ilidža, općinski načelnik prof.dr.Senaid Memić.

Ovom skupu prisustvovala su još i delegacije: Velenja, Sežane, Ljubljane, Laškog, Koruške Austrija, Garibaldi Brigade iz Italije, Crne Gore, Hrvatske, Srbije, Makedonije, kao i delegacije svih UABNOR-a Kantona FBiH.

Akcija darivanja krvi

Crveni križ Općine Ilidža je 19. januara 2016. organizovao akcija darivanja krvi u prostorijama Crvenog križa Ilidža. Akciji se odazvalo 34 davoca, a krv je uspješno darovao 21 davaoc. Akciji su se odazvali članovi sportskih klubova sa područja općine Ilidža.



Završena škola skijanja

Kako je i najavljena promjena vremena, prve novogodišnje pahulje snijega pale su i na Ilidži. Vjerujemo da se ovom gostu najviše raduju mališani koji zimske radosti sa zadovoljstvom provode u parkovima i na ljepoticama Bjelašnici i Igmanu. Ilidžanski osnovci raspust su proveli na čistom zraku, a mnogo je onih koji su se okušali i u zimskim sportovima. Općina Ilidža je i ove godine sa Udruženjem RVI organizirala školu skijanja.

Za ovaj projekat Općina Ilidža je izdvojila 5.000 KM. Školu je završilo uspješno 90 polaznika. Obuka je trajala pet dana. Obuku su vršili profesionalni instruktori uz jednog pedagoga i dva pomagača, a djeci je obezbijeđen prijevoz, topli čaj i grickalice. Cilj projekta je da se učenicima tokom zimske sezone omogući boravak na snijegu kako bi usavršili osnovne elemente skijanja, te bi kroz ove aktivnosti trebali jačati odlučnost, hrabrost i upornost, a sve kroz druženje i možda nove simpatije.

Načelnik prof. dr. Senaid Memić u svom obraćanju skupu izrazio je zadovoljstvo i zahvalnost organizatoru i svim učesnicima skupa te zaželio gostima ugodan boravak na Ilidži i Igmanu.




Održan košarkaški turnir za juniore

Na Ilidži je 31. januara održan košarkaški turnir za juniore koji je organizovan posredstvom košarkaškog kluba Igman. Na turniru je prisustvovalo osam ekipa, a igralo se po sistemu knock-out faze.

Prvo ime turnira je ekipa "LA Clippers", a za nju su nastupali Edis Vreto, Enis Bektić, Tarik Ušanović Bijedić, Eldar Zulčić, Haris Hrvat, Damir Aladžuz. Drugoplasirana ekipa "Dream Team" nastupala je u sastavu: Haris Pandžić, Nedžad Alihodžić, Arnel Hadžajlić, Stefan Janićijević, Luka Damjanović, Andrej Ćorić, Haris Ćehić.

A trećeplasirana ekipa Igmana je bila u sljedećem rosteru: Armin Šaćić, Bakir Buljina, Beriz Hasković, Muahmed Redžović, Denis Suljić, Almedin Ademović, Mirsad Abdulji, Dino Mešić, Emir Velić, Midhat Gutić, Faris Stambolić, Amar Brajlović sa trenerom Semirom Mulaosmanovićem.



Podsjećamo vas zašto smo jedinstveni

Snaga prirodne vode u liječenju

Prve fizičke i hemijske analize termomineralne i sumporne vode na Ilidži uradio je 1886. godine prof. dr. Ernest Ludvig. Od tada do danas ova voda ima konstantan sastav i temperaturu. Ona je i danas hidrokarbonatna -sumporna-kalcijumska-natrijumska, temperature oko 58 stepeni Celzijusa. Dublje dno iz kojeg izvire termalna voda Ilidže pripada trijasi, ali prva formacija od koje terma ima svoje porijeklo nalazi se dublje u paleozojskom ili čak metamorfnom gorju. Bilo gdje da se ovaj sloj provrti nailazi se na termalnu vodu. 1929. godine otvoreno je novo vrelo koje termalnu vodu baca poput gejzira oko tri metra visoko. Da ne bi slabila usljed dodira sa zrakom te se mutila i ostavljala talog na dubini od šest metara u zemlji posebno spojenom cijevi dovodi se u hermetički zatvorene rezervoare. Budući da ova voda

ima temperaturu od 58 stepeni celzijusa mora se rashlađivati hladnom mineralnom vodom do temperature od 33 do 35 stepana. Voda banje Ilidža se može koristiti pijenjem, inhalacijama, te kupanjem. Termalna voda se kao piće sa uspjehom koristi kod liječenja hroničnih upala sluznice probavnog aparata - katara stomaka i crijeva. Rasprašavanjem u čestice finog aerosola inhalacijama upotrebljava se kod bronhitisa. Posebni efekti liječenja postignuti su kod hroničnih bolesnika sa upalom sluznice nosa, sinusnih šupljina i tonzilo-faringealne regije, tj. bolesti ždrijela. Kupanje odnosno banjanje u sumpornoj vodi daje rezultate kod oboljenja poslije povreda lokomotornog aparata i reumatoidnih oboljenja. Dalja primjena termalnih voda Ilidže je uspješna i kod oboljenja ženskih bolesti i ženskog steriliteta.

